

本朝分省人物考

人物考卷之三十二目錄

南直隸淮安府

楊靖

韓政

張士彬

劉榮

羅銓

金濂

丁泰

王瑜

沈翼

劉安

沈麒

畢德

葉淇

宮安

葉贊

李瓚

張素

石渠

楊理

徐聯

曹琥

陳讓

楊宏

孫清

張朝瑞

楊旻

岑義

本朝京省人物考卷之三十二

南直隸淮安府

楊靖

楊靖字仲寧淮安山陽人洪武十八年乙丑舉進士  
爲庶吉士試事吏科以才能著聞隨擢戶部試右侍  
郎實授左侍郎在職公勤 詔有司復其家因進士  
監生犯罪不悛 御製大誥指示而激勸之曰如通  
政使韓宣左通政茹常戶部侍郎楊靖工部侍郎秦  
達皆同時由進士監生而登顯職各能率職以稱朕  
心惟恪遵先聖先賢之道故能伸於羣職之上其犯

罪不悛者終至於殺身而已二十三年陞刑部尚書  
二十四年命以尚書兼太子賓客給兼官俸靖資性  
明敏有識善敷答理刑平恕上數獎勵之尋以事  
免命出使安南還改左都御史至是鄉人坐事繫  
獄家人擊登聞鼓訴狀靖爲改狀草御史劾之上  
念其才不之問御史論不已迺賜盡於家父懋兄安  
奉命歸葬於淮年三十八平生自負忠赤東書  
入京不十年位崇台輔以布衣奉使海外蠻貊敬信  
則其人可知矣

韓政

韓政睢寧人元季爲義兵長 上定江左來歸授江  
淮行省平章政事李濟據濠爲僞吳守 上命善長  
書招濟不報 上曰濠吾鄉濟爲僞吳守是吾有國  
無家可乎命政率指揮顧時等以雲梯砲石四面攻  
濟濟出降留時守濠召政攻安豐以兵扼四門攻不  
下潛穴城東龍尾壩二十餘丈壞城遂破安豐忻都  
竹昌左君弼皆出走追獲忻都昌君弼走汴竹貞來  
援又破貞克安豐至穎獲糧艘歸淮東西悉平從平  
浙右北伐中原分兵扼黃河斷山東援兵取益都濟  
寧濟南東平攻山東行省平章政事大將軍取元都

檄政會東昌鎮撫臨青元都定又令政分兵守廣平  
蟻尖寨者在林慮西北二十里元右丞相庸等據寨  
剽剽旁近以給軍食徐將軍收諸山寨蟻尖寨據險  
絕未下政進攻庸降調征陝西還兵守禦河北洪武  
三年封東平侯食祿千五百石與世券移鎮山東未  
幾復征河北招撫流移出居庸搗應昌取河林深入  
土刺進至阿魯渾河大獲而還出巡河南再巡陝西  
練兵臨清十一年卒贈鄆國公子英散騎舍人

張士彬

張士彬山陽人洪武中以才行卓異薦授江寧知縣

政尚寬簡能以和民尋遷監察御史益著直聲陞河南按察使所在風紀振揚貪墨屏迹未幾卒于官

劉榮

劉榮宿遷人爲總旗從靖難立功夾河藁城泚河陞督府僉事出塞討馬哈木阿魯台進左都督充總兵守遼東改名江當是時倭寇數入永樂十七年倭船入王家山島傳烽至榮率精兵疾馳入望海埚明日倭數千入分乘二十艘直搗馬雄島圍望海埚發伏出戰遣奇兵伏山下斷其歸路倭奔入櫻桃園榮合圍斬捕甚衆自是倭大創迄今不敢犯遼東詔封廣



寧伯食祿千二百石與世券還鎮十八年卒贈侯謚  
忠武子安嗣正統十四年從征降都督同知景泰中  
守大同詔復伯爵時 上皇至大同安邀郭登出見  
郭曰虜不可測吾二人者守土爲職脫有變柰社稷  
何掇甲登城北面拜曰臣義與城存亡安竟出見命  
進侯從 上皇入京言官葉盛劾安落侯復爲伯天  
順元年進封侯加祿六百石與世侯券成化七年卒  
贈嶧國公謚忠僖

羅銓

羅銓字文衡山陽人永樂辛丑進士宣德丙午擢監

察御史丁內艱歸服除補原秩銓靜專沉毅晰于律比廣東民墾兵後荒田厚獲境內屯卒欲攘之不得因結衆夜竊所獲民覺起逐之有三人失道溺死按察司以民三人抵死獄上銓言於都御史顧公律竊盜棄財走主追殺者免罪矧溺乎於是三人之罪乃釋常州奸民告豪家謀作亂株連甚衆奉命往按之皆妄遂抵告者罪其明于治獄如此刑部郎有私忿相詬聲徹堂上大司寇不能制銓曰是可長乎遂劾奏忿詬者皆降黜超擢湖廣按察使既至獄有繫囚二千五百久未決數日發遣殆盡時民間征調繁夥

有司往往罪之銓率從其輕典每語其同官曰內執法獄議或失中有大理寺爲之平外莫與平者何可以不盡心景陵令楊季安廉正不阿見嫉于州州誣其罪於鎮撫使已下楊獄銓爲白之復楊任而罷州官之造誣者都指揮陳震縱私不法奪公廨爲私居糾正其罪武臣有搖言以撼者卒不爲動未卒前數日猶力疾草奏言都司官係一道武臣儀表不可濫授犯賊罪者宜徑削原職不得循例罰役復任奏減各郡驛馬千二百疋遞運所夫七百餘人以舒民力年甫四十有七而卒湖湘之人若喪所親

金濂

金濂字宗瀚山陽人賦性警敏豁達自少勤問學經傳子史疊疊成誦永樂戊戌第進士拜湖廣道監察御史凜然卓持風裁宣德初巡歷廣東江西所至有聲既還浙江豪徒史慶真亡命有司索之不得皆被累詔濂往捕獲之以父憂去官尋起爲陝西按察副使方是時虜酋朵兒只怕擾邊遂勅濂巡撫兼督甘綏各郡糧餉規畫有方兵食給足以功擢都察院僉都御史分鎮寧夏久之陞副都御史虜旣款附邊境又安暇日輒詣學命諸生講論經史將校環聽之雖

寒暑不廢西人翕然頌濂之理不獨邊務修而且教化成也未幾 召還陞刑部尚書在職悉心庶獄姦慝無所貸而欽恤一念不忘正統戊辰閩寇鄧茂七作亂甚張命偏師往勦之而以濂理兵政時將校多不戢寧濂患之有犯者一繩以法授諸將以方略而躬撫輯其民俾各有寧宇賊竟盪滌民用乂安遂全師而還濂之功爲多隨兼太子賓客尋太子太保兼戶部尚書景泰初邊務方殷供餉匱乏日夜經畫以濟一時之急有所見輒言於 上汲汲以足國爲已任怨訕紛騰毅然弗顧也聞四方水旱憂形於色講

求荒政奏遣使賑卹嘗辭師保之俸詔優荅之謂其於軍國之事多所用心濂益感激自效日忘其勞景泰五年以疾卒於位享年六十有三濂自入官以來歷事五朝盛名偉績卓然一代重臣訃聞命有司治葬事遣官諭祭追封沐陽伯謚榮襄

丁 泰

丁泰海州人永樂中鄉貢選授戶部主事立朝以剛正自持人呼爲鐵面丁後謫判興化清慎愛民賑歲饑弭虎患綽有善政莆民至今思之

王 瑜

卷三十三  
周仲

王瑜字廷器山陽人選隸趙簡王護衛永樂癸卯五月太宗皇帝微不懌數日未出見羣臣仁宗皇帝在東宮軍國政務悉啓聞施行邪僻傾險之徒不得騁其私戚所不便簡王時留北京敬修孝弟其護衛指揮孟賢等十數輩潛結曆官王射成等及內侍養子共構邪謀欲俟宮車晏駕矯詔從中出立簡王而已得志焉實秘不令簡王知蓋慮不從卽事敗齏粉而尸其謀者瑜之姻家高以正也布置已定高密以語瑜駭曰此天壤間極惡大罪鬼神所不貸者奈何甘爲覆家滅祀計高不聽又涕泣戒之高怒而慮其

泄也謀害之遂詣闕密疏 上覽之初疑其詐諉曰  
豈應有是反覆詰難衆爲瑜危辭不少挫旣捕賢等  
至 上親問狀得其邪謀本末及所造僞詔立誅之  
陞瑜遼海衛千戶後賢等皆伏誅召還又陞懷遠將  
軍錦衣衛指揮同知有旨戒其同官事必關白瑜勿  
謾瑜正直坦明每事求大體所隸官校心歸之無間  
言見知於 上宣德中陞都指揮僉事僉署左軍都  
督府僉事克左副總兵佩漕運印總督江南民之輸  
北京者兼守淮安正統初實授驃騎將軍左軍都督  
府都督僉事在淮安承平江伯之後謹守其遺法不



變展誠布公虛已從善處同官能讓淮安兵民襍處  
素怙勢厲民瑜至首下令禁戢爲政重倫理有富民  
親在而與弟競產訴於瑜者瑜曰爾富而委親之養  
於弟而又訟弟孝友二行皆缺矣杖而斥之人服其  
明臨政務寬有二卒盜敗舟一板梟司坐盜官物抵  
死以質於瑜曰兩卒之命抵一敗舟板耶改坐不應  
平恕多類此好以義感人有婦翁以白金畀贅壻爲  
市取息者壻不善市不能償索之急欲自經翁執以  
告又有自顯官歸資橐豐厚其弟有宿逋貧不能償  
索逋者急弟乞償於兄纖芥不得瑜聞之皆爲代償

荒歲發廩多所賑活嘗覽農桑撮要歎古人用心民事遂益其所未備者十數事刻梓以傳南有浮圖人簧鼓師說所至惑民淮安典兵者與之暱爲建刹居之而廣敝地爲民厲瑜笞而逐之悉復民地淮人死不葬焚屍而委於水瑜相城外多空地畀民以葬遂革焚屍之俗築室所居之側延師以訓武臣子弟閒暇躬往督勵如巳子弟然嚴於自守於利非分一介不取服用清約門無私謁致勤於公雖病不廢至是以計事詣北京力疾入見又明日出視漕舟竟不起享年五十有七

沈翼

沈翼字克敬山陽人宣德庚戌進士授戶部主事正統八年出征雲南命轉輸糧餉事以克集十二年命徙沙州達官安置東昌平山諸州縣陞戶部郎中翼有心計持已精廉蒞政勤慎十四虜入寇欲據通州勅翼焚其積聚無資盜糧翼乃僞燒腐草煙燄蔽天虜遁去上嘉其才又以芻糧不給軍餉告乏而翼久在戶曹計慮精密超拜本部右侍郎卽勅催儻驚散糧船同平江陳豫鎮守臨清疏築城隍訓練士卒防遏奸宄仍兼督漕接濟京儲癸酉陞南京戶部尚

書適山東大饑居民流徙奉勅暫留賑濟民用救寧  
比至留京祛弊革蠹部政一新時廩庾告虛多方儲  
峙久之忽有歸志屢疏乞致仕得歸日與宗黨父老  
賞會游燕以自樂其天年得壽六十有六性鯁介不  
阿雖善者一事未當卽面斥之不善者能自改悔卽  
稱許不置故人皆敬憚悅服而不及於怨云

劉安

劉安字志康其先泗州人國初徙居山陽因家焉安  
幼警敏過人父曰他日顯劉氏者必此子也幼失怙  
恃旣長質貌魁偉舉止端重嘗撫松楸歎曰有親而

不得養與夫有子而不能顯揚者同一不孝因肆力於學入郡庠爲弟子員累舉不第貢入太學宣德癸丑擢知南宮縣慎於操守勤於撫字教民以樹藝聯士子以進修置義倉義塚貧有養死有歸北方賢有司莫能或之先也甲寅夏境內旱蝗率吏民禱三日乃雨蝗亦頓絕是歲鄰邑皆饑惟南宮大熟明年鄰邑復蝗獨不入境又大熟民歌之曰侯宰南宮民和政通蝗不入境今之魯恭頌聲播遠邇時有賊張普祥等以白蓮教聚衆倡亂河北騷動安捕其黨仲五等檢其家得簿書錄妖者姓名吏欲送府窮治之曰

不可亟火之全活者幾萬人邑南有李陽水廟碑高丈餘歲久祠頽碑且仆一日率僚屬祈雨至祠下見碑石甚巨非數百人不能起告於神曰神如有靈碑自立安當新其祠翼日雷雨大作四野霑足碑且起立安以銀鯨奠神就付諸廟中因具其事 上聞且請新其祠詔許之召工薙草萊增基址興版築掘地獲錢六十萬緡遂爲修葺之需期月而廟成正統辛酉春慨科目久乏乃割俸資市巨木送學官語諸生曰吾以科目望汝輩不負所望者當以此木表其坊是秋白圭鄉薦舉進士歷官學士太子太保兵部尚

昔遂以所市木立鄉貢進士坊又出俸金厚贈之自  
是人才輩出科目有人九載秩滿民攀號塞道車不  
得行既又詰闕借寇不果留尋被薦陞知杭州府府  
衝繁難治安處之易於庖丁解牛未幾陞浙江布政  
司右叅政二年病卒年六十有二安有士行有吏才  
英敏果斷寬裕有容其在南宮安與圭有父師造就  
之恩在浙藩圭與安有僚友交承之誼處之各盡其  
道人皆以爲難云

沈 麒

沈麒沐陽人爲邑諸生正統中山東盜起掠至淮安

郡守被執至沐陽民皆逃匿麒以母病不去俄聞守見執徑趨賊壘諭以大義賊爲感動旣釋郡守復贈麒米肉而歸御史張惟恕大書忠義表其閭

畢德

畢德淮安人正統初朝廷募力輸芻粟助邊德慨然應詔從子瑛授職千戶而冠帶給德丁巳徐淮大水民饑發粟二千石賑之巳巳朝廷命將南征士阻淮漲不可渡乃造巨艘二於清河口濟之民有李氏婦以舅氏牛借鄰耕作未幾牛死欲賣身以償卽代償之天順癸未黃學士廷臣謫廣沒妻孥扶柩歸葬甲



申夏舟阻淮上不能歸巡撫王都憲公度弔而憫之  
詢可任後事者淮之父老咸曰非義士德不可德卽  
請館於家買地葬之市屋居其妻孥財物俾不失所  
成化丙戌民饑鬻子女者衆悉以善價收育立合券  
約歲豐還之鑿義井十餘口以濟汲置義阡三區以  
便葬造橋四座以利往來設義學清平坊以教貧家  
子弟施藥餌圓明寺以療人疾疫婚無以娶者錢帛  
之死無以斂者棺衾之其汲汲焉爲義若饑渴之嗜  
飲食惟恐不及於是義聲溢於淮甸雖販夫野婦皆  
知德之篤於義也尤好崇飾祠宇像設費貲鉅萬至

重建徐節孝祠尤爲義云

葉 淇

葉淇字本清山陽縣人景泰五年進士授監察御史  
歷陞廣西按察司僉事陝西副使按察使擢都察院  
僉都御史巡撫山西未幾改大同贊理軍務建議設  
井坪千戶所及加減徵草罷土兵戍邊之不便者弘  
治元年召爲戶部右侍郎至尚書加太子少保時奸  
民有私獻大名府爲皇莊者貴幸復主之淇用衆議  
率歸之官哈密爲土魯番所陷守臣請暫給廩食處  
之內地淇曰是自招禍也事遂寢充廷試讀卷官忽

眩仆於上前因是乞致仕去及卒賜祭葬贈太子太保洪亮直有操執歷官皆有能聲其在戶部尤能惜財用每廷議用兵輒持不可蓋患轉輸之費也士論多其能執從子贊官至刑部侍郎

### 官安

官安山陽人累官廣東按察司僉事持憲嚴明綱紀振肅致仕歸行橐蕭然圖書數卷而已時都御史王竑嘆羨以爲不可幾及家居十餘年足不及城府有司至不知邑中有官僉憲者後以上壽終

### 葉贊

葉贄字崇禮山陽人天順甲辰進士任刑部主事歷員外郎郎中鞫讞明慎人稱不寃出爲嘉興府知府改台州廣信以操履清謹聞旣去民皆思之遷四川布政司叅政江西左右布政使徵拜右副都御史總督南京糧儲藩僚以故事餽贄謝不納其督糧儲嚴出納清宿弊繼者多遵其法轉南京工部右侍郎又轉刑部請老而歸足跡不至公府郡大夫賓之鄉飲亦不赴未幾疾卒賜祭葬如例

李 瓚

李瓚山陽人天順間進士選庶吉士任吏科給事中

封駁彈劾不避權貴時負剛直之稱歷官浙江布政使所至咸著能績以致仕歸卒於家

張素

張素字玄卿號檜泉山陽人領成化乙酉鄉薦五上春官不第謁選授河陰令初至適歲大稔饑殍載路又承凋弊之餘百蠹孔棘素惟是簡訟獄罷追呼節厨傳平市價禁和買停權稅裁靡文息奢風寬征輸與民休息賴以救寧邑有廣武山政暇邀一二廣文登山酌咏析楊晝臥邑庭空寂聞其無人當事者屢薦其治行方將有不次之擢而浩然決歸兩臺勉留

之不得給舟遣贖以行林臥三十年足不入城市田園廬舍不改其舊日以文墨自娛有檜泉集藏于家年八十有九而卒

### 石渠

石渠字翰卿號天全道人清河縣人穎敏超卓剛毅老成舉成化乙酉應天鄉試登丙戌進士擢刑部主事遷員外平允守法陞山東按察司僉事分巡遼海東寧道兼管糧儲遼陽食糧腐爛者半首按官吏奏黜爲民州衛貪婪者聞風落膽有改行自新者卽加獎籍以勸其進人皆感服在遼陽數年撫卹官軍禁

革奸弊邊境賴以安堵擢本司副使一日郊行遙見人影出沒林木中近復不見命部卒搜叢林中得頂包僧十餘人解其包有物在焉鞫問之昨宿尼寺殺商人而奪其貨驗屍賊皆伏辜奏毀其寺尼配諸鰥夫癸卯山東大饑奉檄齎銀五萬兩賑穀江南太平府渡揚子江風浪大作舟幾覆人皆號泣渠獨神色不變焚香祝曰此行爲救數百萬民命渠何足惜神其鑒之言未既風浪頓息載穀而歸上下胥慶分賑饑民賴以全活未幾陞本司按察使審核重囚日有平反察舉貪廉憲體振肅雖老吏進呈文移惴惴焉

莫敢仰視黜姦猾舞文者數輩令行禁止丁未會朝  
覲考察主其事者頗有宿憾必欲置之散地先期有  
聞遂拂衣而歸置萬柳莊奉二親正德丙寅恩詔進  
階一級病卒年七十一

楊理

楊理字貫之山陽縣人成化丙戌進士授刑科給事  
中陞鴻臚寺少卿十五年遷大理寺左寺丞十八年  
轉左少卿任法平恕時陽曲王府獄事涉疑闇理奉  
勅勘覈悉解寃濫二十三年陞右副都御史巡撫河  
南值歲歉河復決於汴民心恟懼議徙省避之理至



乃增高汴堤水不爲害又以流民入永寧者甚衆不俟奏報發倉廩賑之比勅至悉如所議所活不可勝紀汴賴以安民有以租田詐爲閒地投獻諸王府者槩爲陳乞申禁之弘治三年入爲工部右侍郎卒於官詔祭葬如制仍錄其一子入太學

徐 聯

徐聯字成章淮揚衛人弘治丙辰進士拜南京大理評事明習法比獄多平反嘗劾罷刑曹舞智亂法者一時無敢高下其手歷九載轉寺正陞河南僉事備兵信陽地當四省交會多山谷奸盜藪藏聯以靜廉

寬仁治之政簡民和以母喪歸服除仍補前職有巨盜賂鎮守中璫廖堂求脫必寘於法堅執不搖久之陞陝西右參議時冢宰張綵欲營私第假檄取帑積擲其檄於地不從陞本省副使治兵肅州時有虜警置家屬於鞏昌單騎卽戎指授方略扼險守禦虜卒遁去乃謹斥堠厚糗備精簡閱禁諸將之侵漁及絕入貢哈密土魯番諸夷私覲內外帖然忽得瘖疾遂乞致仕家居五年卒於家年五十有七生平清修苦節仕宦二十年圖書之外無長物每去任凡有司器什必按籍檢還所著有畏齋稿藏于家

曹琥

曹琥字瑞卿號秀山巢縣人弘治乙丑進士奉命遼左犒軍歸授南京刑部主事丁內外艱終喪改戶部主事時錢寧以孽嬖上冒國姓權傾一時士大夫無敢正言不諱以發其奸者御史玉巖周公上疏歷數寧罪謫爲嶺外驛官琥直前論救謂嬖倖當遠忠直當容竟以朋比爲罪左遷河南府通判寧以爲近矯旨改調雲南尋甸琥怡然就道不爲沮挫量移黃州未幾陞廣信同知時逆濠及鎮守中官假進獻檄取郡中茶葛諸物濠倚寧勢霍燄薰天莫敢忤視琥言

此非額諫抗不與以狀申臺使者必得罷而後已久  
之擢鞏昌知府將之任道病還卒於家嘉靖初巡按  
御史列其狀以聞詔贈光祿寺卿遣廬州守諭祭於  
墓

陳讓

陳讓字德光別號雲軒山陽縣人弘治間登進士拜  
寶坻令民俗健訟讓聽斷明決羣惡竊視皆遁去卒  
擒首惡寘之法一縣帖然歲凶勸富民出穀賑貸及  
歲稔如約給還咸服其威信陞尹宛平縣都人倚勢  
包攬糧差積年殃民牢不可破乃均定賦役公收糧

稅權貴請託一切不行權知杭州府息器訟均賦役  
抑驕侈敦薄俗境內大治時海漸內徙逼海寧城部  
使者訕羣策莫能治乃請去城一里許開支河築內  
堤延袤十里以寬制猛不與海爭海果至堤而止上  
下神其識鑒海寧人立生祠以祀省城奸人多托權  
勢家避匿糧差悉查覈歸正無敢怙終者大理卿夏  
時正居家挾老姦持上下官短長強占孤山三賢堂  
并祀田民田力奪還官給主夏銜之誣奏勘官朱守  
孚不察其爲清白吏望厚賂欲妄加叅論人心不平  
有二三義民潛欲出金賂之讓聞之曰吾本爲利民

豈反以擾民乎持不可竟被叅奏落職都御史楊繼宗上章論救不報闔郡吏民冤號攀戀不忍其去貧居二十年杜門不出一介不取予一刺不入公門會赦復官病卒年六十八卒之日室如懸磬親友治其喪事三十年後太僕卿仁和邵銳言於浙省巡察祀於名宦祠過淮言於撫鎮應祀鄉賢祠而時已祀矣亦以見人心之同然云

楊宏

楊宏字希仁號容堂海州人生而豐頤廣頰音吐洪亮雙目炯然稍長精通經史才氣勃勃逼人以廕叙

家強嚴禁令曾臺有失馬者愬之宏曰去盜將還汝  
馬矣明日果遺馬空室中人咸以爲神弘治己未檄  
守紅城尋守備固原時遂菴楊公總制於斯宏獻策  
以紅古城乃北虜入寇必由之路宜築城鑿池募衆  
屯田庶幾無患甫閱月軍士雲集築邊墻凡數百里  
楊公聞於朝賜大紅彩幣六襲正德己巳掌陝西都  
司事漢南盜起檄宏征之迎戰於西鄉追至巴縣蒙  
勦斬首八百餘級賊遂平庚午充右叅將尋陞總兵  
官鎮松潘番酋雪郎王大肆虜掠久無能制者宏督

衆往薄其族擒雪郎王斬之以徇百姓大悅事聞詔賜彩幣白鏹壬申蜀盜鄢本恕等數萬人聲勢張甚受勅充總兵官節鎮巴蜀宏謂總帥洪公曰逋誅之寇潛伏山野實無異圖但巢穴深邃地里遼遠耳若四省夾攻勢蹙必散是時賊侵清微宏遣部兵先進自統大兵繼之賊奔潰乃遣人詣軍門乞降巡撫都御史高文明信之不疑將報功邀宏署御宏曰此僞降也不從未幾賊果叛而當事者反羅織以歸罪於宏遂謝事家居乙亥以大臣論薦召至京遷南京右都督府都督尋受制勅節鎮淮揚督理漕運世廟



卽位有白金彩幣之賜漕運舊規歲久廢壞至正德末年極矣比至晝夜經畫剔抉弊蠹清查逃逋增造淺船每歲運船至通州車運太倉歲費四十萬緡宏考元故道建閘蓄水設官置役由朝陽門直至京師又疏趙皮寨渠以殺水勢故事漕司額外耗米折徵輕齋綱吏隨便益哀漸至那移弊不可詰又權要多索運蓆諸物事雖微細積累不貲一切禁革踰五七年所積者運銀以二十萬兩計蓆銀以九萬計車腳銀以二十萬計省造船銀以三萬計戊子淮安大饑上四事曰節民力寬商稅弛鹽減漕糧復捐金施粥

存活無算累疏乞歸致仕壽七十有九好讀書至老  
不輟發爲詩文可追古作者所著有漕運志容堂雜  
稿自考錄藏於家

孫清

孫清睢寧人縣學生少孤事母以孝稱於鄉黨正德  
七年母卒時流賊入境清守柩不移竟日哀慟賊爲  
感泣相戒勿犯隣里亦賴以不擾事聞 詔旌其門

張朝瑞

張朝瑞字子禎海州人隆慶戊辰進士時州有倭警  
議築城卽捐坊金爲倡事以易集授安丘令有能績

丁內外艱歸服闋補知鹿邑至則賦溢額者蠲之土蕪蔓不理者闢之集流移舉鄉約嚴什伍大約以惠元元遏奸宄爲急邑疆半侵于衛衛虛賦乃履畝以覈復侵地七千餘頃於是聲聲者二輔間矣遷戶部員外晉郎中凡鈔關板閘之役有膏脂可潤者力辭不行時稱貸爲朝夕費至事闕大體則悉心以籌大司農倚重焉出守金華會歲饑穀涌乃出帑金貴糶而平糶民忘其災郡故有先賢祠日圮更葺之拓爲書院置田二千餘畝延師儒貯載籍以教之遷濟安兵使者兼治河時有議鑿性義嶺相度川原

謂鑿險而勞數十萬人之力損大農金錢非便慨然  
建議有三當謀八可已二可患之說與總河意忤杜  
門求去因調金衢而總河糜度支水衡錢無算功卒  
不就移湖廣叅議黜貪屏殘一以靜安爲理疏請止  
礦民尤戴之召爲京兆丞遷鴻臚卿會黃河西注漕  
綱爲梗抗疏極論之大旨在塞黃堦口復徐邳故河  
謂黃堦口不塞則徐呂水不流江南四百萬漕艘無  
入京之路疏上主計者不決攝南京兆篆向置學田  
額租久負鉤搜伏匿得五百餘金益買良田以贍士  
之貧者京兆有表忠祠祀遜國諸臣益檢括史志增

至六十人且輯忠節錄以垂永久累推太常卿命未  
下疾作一日端坐而瞑卒之日筭無遺金賴南中士  
紳奔賻始克成喪以歸

楊旻

楊旻字克彰淮安人然鄉族之長老交游之士夫未  
嘗名之字之難田夫市卒廬兒鬻婦咸呼之曰楊孝  
子故楊孝子之名達諸京師聞諸四遠也天性端慤  
自幼事父母孝事兄極恭父蚤世哀毀甚母陸慰解  
之卽強顏以悅母心而哀不衰事母之道備至家無  
厚資而甘毳饋養必如母志母酷愛其孫時牽率抱

弄於前枚指之曰某可承家某可事生業某當作官  
以顯門閭母聞之大悅門戶有憂戚不卽告母嘗愉  
色婉容在左右以安母心暇則坐塾中誨諸子及鄉  
鄰之秀彥必以躬行孝弟爲先才質輕俊善文章者  
少忽於孝弟則懇懇諭之弗改則厲聲斥絕之母嘗  
病醫禱無所不至晝夜未嘗安寢飽食母歿哀號頓  
仆水漿不入口者數日及葬遂廬於墓側衰絰不解  
晨奉櫛頰夕奉浣濯如生時不少廢哀號之聲聞者  
感動鳥爲之翔獸爲之伏左布政使蘭陽丘陵時爲  
太守兵部尚書王竑時爲都憲鎮淮爲孝子名廉得

其寶遂上聞旌其門

岑義

岑義邳州人自幼以至孝聞問安必拜跪飲食湯藥必親調而後進母盲義朝夕餵之目復明父母卒義哀毀苦次幾於滅性及葬負土成墳廬墓三年甘露降於墓樹有司上其事詔旌其門

本朝分省人物考卷之三十二

人物考卷之三十三目錄

南直隸廬州府一

趙庸

俞通海

廖永安

廖永忠

楊璟

張德勝

桑世傑

花茂

胡通

袁義

陳聞

吳復

楊廣

薛祥

劉真

周顯



劉謙

許榮

朱亮祖

王珪

汪河

陳瑄

張子貞

本朝京省人物考卷之三十三

南直隸廬州府一

趙庸

趙庸合肥人 高皇起義兵庸率衆歸附從渡江板  
采石克太平定金陵累立戰功陞樞密院僉事從破  
安慶下九江與陳友諒大戰於康郎山偕諸將連擊  
敗之友諒欲自湖口逸去庸等邀擊之友諒中流矢  
貫睛及顱而死其子理奔武昌復稱帝從平武昌回  
克廬州并兩浙進圍姑蘇與諸將分門而軍各嚴所  
部四面困之城破士誠就縛師還 上詔庸於戟門

賜絲段衣裏陞中書左丞明年從大將軍取山東下  
濟南戊申 上卽帝位詔庸以中書左丞兼太子詹  
事率步騎自中灣進取河南克之遂命庸居守大將  
軍遠旣拔關陝擇將鎮禦遂班師謀取元都庸與諸  
將各領軍衛分布士馬以次平定元將也速兵侵通  
州 上命庸從常遇春率兵東還拒之遂搗永平至  
大寧也速遁去連破開平元君北奔追至北河俘其  
宗室大臣及軍馬衣械之類師還燕時慶陽未下  
上命庸副李文忠率師往應大將軍合攻之行至太  
原聞元兵攻大同遂出鴈門至馬邑進次白楊門與

元將脫列伯大戰生擒之孔興走綏德其部將復斬  
之來降元主知事已不濟無復有南向意矣未幾慶  
陽亦平已復同文忠率師北至應昌克其城獲元君  
之孫買的里八剌及后妃宮女金寶玉冊省院諸官  
時元君已殂太子愛猷識理以數騎北奔追之不及  
而還過中興擒元將江唐國公凡紅羅山擁兵自固  
者皆降大軍所至朔庭遂空師還定封典庸爲南雄  
侯食祿一千五百石 賜誥券予世襲十四年秋閩  
南廣東羣盜猖獗 上命庸率師討之漳州南靖民  
亂掠鄉邑庸遣兵擊捕其黨又平海陽亂民及程鄉

盜討東筦諸盜又克龍湖大牛潭源洞等賊事聞命  
賞將士有功者綺帛有差詔庸班師至京入見上  
獎慰殊至賜綵幣上尊良馬命巡撫北邊訓練士  
卒至冬召還洪武二十六年病卒

俞通海

俞通海字碧泉巢縣人父廷玉聞太祖開闢河陽  
歲乙未父子與諸將率舟師來歸上大悅謂幕官  
李善長曰吾欲渡江正乏舟楫通海父子以舟師全  
附良應我機是年五月親率兵至巢湖諸將迎上  
登舟謀出東口因大水舟至桐城閘未入江中丞蠻

子海牙集樓船塞馬腸河口諸兵受阻屯黃墩將號  
雙刀趙者陰畜異志通海父子與李普勝及將軍廖  
永安桑世傑等密露趙機上脫身歸河陽集商人  
舟載猛士復至黃墩督其兵攻蠻子海牙敵高船大  
通海與永安德勝操舟如神勇不可犯直趨和陽攻  
中丞水寨賊衆潰散繼攻鱗魚洲水寨及新沙舟大  
獲而還授萬戶六月從上渡江克采石取太平有  
功遂攻取涇縣溧陽復取三汊口敗蠻子海牙十二  
月於灌渡橋河口擒獲賊帥時蠻子海牙悉驅戰艦  
結寨采石元帥也先子陳兆先合淮兵數十萬屯營

方山相爲犄角窺伺太平丙寅正月通海從上攻  
采石寨蠻子海牙遁走三月從平陳兆先營是月克  
臺城歷沙縣焦門克林苗軍水寨拔鎮江置秦淮翼  
元帥府以通海爲統軍元帥四月取丹陽金壇丁酉  
常州平陞行樞密院判官尋克江陰州宜興四月克  
寧國經東洞庭山元兵暴至通海不爲動賊不敢逼  
戊戌討江陰復取通州十月克太湖宜興等處時雙  
刀趙據樞陽擊敗之復池州陞僉書樞密院事庚子  
陳友諒犯龍江通海擊走之縱火焚其舟賊衆大潰  
陞樞密院同知八月從討友諒遂克銅陵搗同安又

搗九江等郡壬寅取武昌癸卯張士誠圍劉福通於  
安豐通海擊敗其衆回攻廬州七月丙戌 上大發  
兵帥通海等討友諒丁亥遇於康郎山戊子通海等  
進兵薄戰擊敗前軍己丑復與友諒戰自辰至酉殺  
死者無筭乘風縱火焚戰艦數百艘烟焰漲天湖水  
盡赤明日通海等復以六舟深入鏖戰旋繞敵船勢  
如游龍呼聲動天地敵兵大敗通海等還 上勞之  
曰今日之捷諸君之力也八月我舟入江駐南湖嘴  
水陸結營賊舟不敢出糧且盡計窘繞江下流欲由  
禁江遁回通海等軍追擊之友諒中流矢貫睛及顛



而死甲辰攻武昌陳理出降三月陞中書省平章事  
四月廬州平命通海守禦廬州綏定以恩復業者衆  
丙午四月從取濠州九月征浙西克湖州十一月太  
倉崑山崇明嘉定松江降吳元年三月圍姑蘇徐相  
國檄通海共討賊賊敗提兵蕩其營中流矢創甚以  
四月九日歸自軍中 上幸其第見其病革顧曰平  
章知予來問病乎通海不能語遂揮涕而出明日薨  
年三十八駕復臨哭之慟葬金陵城南聚寶山

廖永安

廖永安字彥敬巢縣人永安少倜儻以氣自豪元季

江淮兵起與弟永忠聚兵保鄉里甲午屯湖中爲水寨以捍寇患左君弼據廬州作亂永安等頗爲所窘乙未春聞太祖駐河州乃謀納款乞援太祖大悅以歲夏五月親率兵至巢湖援之永安與弟永忠等迎上登舟出湖口中丞蠻子海牙集樓船塞馬腸河以阻諸兵上歸和州集商舟多載猛士至黃墩與中丞戰於裕溪敵舟高大不利進退永安等操舟如飛左右奮擊大敗之遂率兵入大江至青沙坊再攻中丞水寨獲鬪船一十五艘由是從容侍上還於河州攻破鱗魚洲六月乙卯朔永安引舟從渡江

時西北風順舳艫齊發永安舉帆前行向牛渚頃刻  
及岸守者大駭出兵來拒上麾甲者以進敵不及  
支卽走諸軍奮擊遂拔之乘勝徑克太平蕪湖等處  
蠻子海牙僅以身遁三月統兵攻擒陳兆先復攻集  
慶克之得軍民五十餘萬改集慶爲應天府置天興  
建康翼統軍大元帥府以永安爲昭武大將軍統軍  
元帥克鎮江平太沙下沙等寨取金壇常州宣州張  
士誠兵寇瓜埠永安擊敗之十一月徐達等圍常州  
永安自其壘來援內外夾擊大破之丁酉三月常州  
平以功陞同僉江南等處行樞密院事宿衛帳下十

月同大元帥常遇春自銅陵進攻池州永安合攻之  
遂克戊戌與俞通海等攻江陰并取宜興無錫等處  
生擒朱元帥陞同知樞密事六月士誠兵寇常熟永  
安與戰大敗之七月庚子破士誠兵於通州狼山八  
月總兵征蘇州宜興復叛十月與徐達邵榮復宜興  
旣拔其城復率舟師擊士誠衆於太湖乘勝深入後  
軍不繼俄木淺舟膠與戰不利遂爲所獲士誠欲降  
之永安不屈遂拘囚之後徐達援常州士誠弟來戰  
達遣王玉擊敗擒士德 上喜曰士德士誠謀主其  
人智勇今擒之張氏之成敗可知矣遣人往求和好

士德母痛之議歸永安以易 上不從士德死竟不  
獲歸甲辰 上念永安陷於強敵守義不屈遥授中  
書省平章事封楚國公賜誥丙午七月卒於姑蘇年  
四十七訃聞 上哭之慟親爲文命配祭功臣廟洪  
武元年命築壇於鷄籠山祭之二年祭 太廟以永  
安配享下禮部議定謚號曰武閔

廖永忠

廖永忠楚國公永安弟也少豪邁有大志智勇過人  
甲午屯巢湖乙未來歸 上見其年少謂曰汝亦欲  
圖富貴乎以水將屬永安永忠爲副從渡江拔采石

太平蕪湖擒陳兆先破蠻子海牙乘勝定建康克鎮  
江宣城討江陰海寇皆有功永安陷敵授永忠樞密  
僉院總永安兵攻普勝柵江營追殺賊衆復樅楊友  
諒襲太平犯龍江諸將據險張德勝總兵進擊永忠  
大呼殺入諸兵從之友諒敗復太平陞同知樞密院  
事 上率舟伐友諒至安慶敵固守永忠擊其水寨  
破敵舟追至小孤山次湖口未至江州五里友諒知  
之窮蹙挈妻子棄城走武昌遂入江州是時友諒圍  
南昌 上討友諒大戰於鄱湖永忠以七舟載葦荻  
置火藥其中乘風縱火焚戰艦數百艘煙焰漲天湖

木盡亦大敗敵兵友諒移舟迎湖口永忠邀其歸路  
友諒中流矢擒其太子善兒以獻友諒次子理奔武  
昌復僞稱帝 上復征理至武昌永忠等分兵柵四  
門又於江中聯舟爲長寨絕其出入 上還建康留  
永忠等守營柵忽與戰 上復往武昌視師督攻城  
降理陞永忠湖廣行省左丞攻廬州左君弼敗走復  
援安豐取江西未下州郡從徐將軍常將軍取淮東  
克海安高郵淮安從拔姑蘇陞中書平章政事湯將  
軍旣下温台慶元等郡方國珍遁入海島永忠爲副  
帥率師自海道會湯將軍討降國珍得兵械舟楫萬

計取福州洪武元年兼同知詹事院事略定閩中執  
友定充征南將軍朱亮祖副之率舟師由海道取兩  
廣永忠自福州遣人諭何真真以廣循惠降師至廣  
州龍潭元將盧左丞降破僞叅政邵宗愚山寨獲宗  
愚等捕誅諸叛土豪諸郡相繼降檄諭九真日南朱  
崖儋耳三十餘城皆納印請吏遂取廣西至梧州潯  
貴等州郡皆降師次貴州遣亮祖會陽璟收未下州  
郡兩廣悉平明年還京 上命太子率百官迎勞龍  
灣入見命太子送還第二年撫定泉漳三年封德慶  
侯食祿一千五百石賜世券是年湯將軍充征西將



軍永忠爲副率京衛荆湘舟師由瞿塘趨重慶伐明  
昇四年和克歸州駐師大溪口永忠率所部先進至  
瞿塘關蜀設鐵鎖飛橫據關口我舟不得進永安密  
遣數百人舁小舟踰山度關出上流人持糧糗帶水  
筒禦饑渴蜀山多草木將士皆衣青蓑衣魚貫出崖  
石間蜀人不覺已至率精銳出墨葉渡分兩道夜五  
鼓攻水陸寨將士皆以鐵裹頭船火器而前黎明蜀  
人盡銳來拒永忠已破其陸寨矣旣而將士舁舟踰  
山出江者一時俱發上流揚旗鼓噪而下蜀人大駭  
下流之師亦擁舟前進發火器夾攻大破之斬其將

遂焚三橋斷橫江鐵索斬溺死者無算飛天張鐵頭  
張等皆遁去永忠入夔明日湯將軍兵始至永忠乃  
與湯將軍分道並進湯將軍率步騎永忠率舟師會  
重慶永忠抵重慶次銅鑼峽昇遣使詣永忠軍請降  
永忠俟湯將軍至受降下令將士不得侵掠撫諭向  
大亨戴壽等家令持書往成都招諭遣指揮萬德送  
昇等并降表京師蜀平凱還賜第京師又出征胡捕  
倭八年卒

楊璟

楊璟合肥人本儒家子少沉毅讀書不喜章句好武

略來歸授管軍萬戶以溧水句容金陵功陞管軍總  
管鎮江江陰功陞親軍副都指揮使婺州諸暨功陞  
樞密判官從征友諒克九江黃梅廣濟立湖廣行省  
璟爲叅政移鎮江陵討斬叛寇進攻湖南洞蠻駐師  
三江口陞平章政事充征南將軍平廣西降土官黃  
英衍岑伯顏還京爲偏將軍征山西平唐鄧南陽留  
鎮未幾招撫明昇昇不從璟還復書與昇謂欲以一  
隅之地綿頃刻之命不可謂智若謂險阻可恃蠶叢  
魚鳧之鄉不至足下矣鄱陽一戰友諒授首旋師東  
討張氏面縛此非人力實天命也幡然覺悟自求多

福豈不謂賢智哉儻屬下或以郡獻或以城降各自  
爲身計取富貴當此時老母弱子將安歸乎昇不能  
從湖廣慈利土酋諸蠻爲亂璟討之賊遁溪洞還兵  
洪武三年封營陽侯食祿一千五百石與世券從伐  
蜀次夔州進攻瞿塘不利赤甲白鹽之帥亦退還歸  
川蜀旣平 上以璟無功不賞沅辰蠻亂爲副將軍  
討平之師還佐大將軍鎮北平召還又赴北平練兵  
兼領遼東訓練士卒十五年卒贈芮國公謚武信子  
通十七年與靖寧侯葉昇捕象廣西之左江二十年  
領韃靼官軍往戍雲南多道亡降普定衛指揮使次

達亦官散騎舍人云

### 張德勝

張德勝字仁甫合肥人至正壬辰江淮兵起德勝與  
廖永安俞通海等所部泊據巢湖結水寨以觀時變  
會左君弼據廬州與黃墩將趙普勝聲勢相倚乙未  
聞太祖駐師和陽乃謀通欵上大悅親師兵至  
巢湖諸將迎上登舟入江中丞蠻子海牙集船塞  
湖口以阻諸兵趙普勝陰蓄異志德勝等密露趙機  
上歸和陽集商舟多載猛士復至黃墩攻蠻子海  
牙敵船高大不利進退德勝等以小船與戰操縱如

飛左右奮擊大敗之直抵河陽營於新河是月二十  
八日破鐵長官水寨新生沙寨獲人馬還授萬戶六  
月朔翊上渡江時風順水湧頃刻達牛渚守者駭  
走遂拔采石乘勝徑取太平義兵元帥陳也先與其  
將水陸分道寇城德勝同湯和擊其水軍會徐達鄧  
愈擊其步軍遂擒也先擢太平興國翼管軍總管分  
兵擊溧水克之是年冬蠻子海牙結砦采石兆先復  
屯營方山率衆十萬犄角相望以伺太平丙申二月  
攻采石砦德勝同永安以舟師進破之蠻子海牙僅  
以數舟遁去三月上率德勝等取集慶路大破方

山營擒兆先盡降其衆庚寅克集慶得兵數十萬丙申克鎮江陞秦淮翼元帥四月克金壇八月從攻常州圍之丁酉常州平以功陞樞密院判官四月從克宜州五月下太湖招降張士誠僞帥王貴等遂攻宜興八月攻馬馱沙戊戌同廖永安俞通海攻江陰石牌海寇敗之陞僉樞密院事四月趙普勝自樅楊寇池州德勝帥兵往援至則守將趙忠被執城已陷矣德勝抱憤銳圖克復十月從徐達下宜興己亥三月普勝復寇青陽石埭等縣德勝統精兵與戰於柵江口破走之四月復同俞通海擊普勝大敗其衆遂復

池州九月引兵自無爲登陸夜至浮山砦擊走普勝  
將胡總管敗之於青山追至潛山界陳友諒叅政郭  
泰領兵至沙河迎戰德勝復大破之斬郭泰獲軍資  
無算遂克潛山庚子陳友諒以重兵襲太平直犯龍  
江上大怒命諸將據險以禦以德勝總水陸大軍  
擊之旣而陳氏兵大至陣旣交殺傷相當德勝乃從  
中大呼麾諸將士奮擊友諒敗走斬獲不可勝計

上遣德勝與徐達馮勝等追友諒至采石與大戰德  
勝死於陣追封蔡國公洪武三年贈同知大都督府  
封晉 謚忠毅侑享 太廟子宣中軍都督府僉



本朝少養人德者三十三  
事坐累降世襲廬州衛指揮同知

桑世傑

桑世傑無爲人元亂與廖俞等結水寨巢湖乙未納  
欵趙普勝蓄異志洩其謀上得歸和陽集商舟載  
勇士至黃墩攻敗普勝及蠻子海牙上趨入和陽  
諸軍大集卽攻破采石取太平擒也先蠻子海牙遁  
擒兆先入金陵拔鎮江陞秦淮翼元帥下金壇丹陽  
從圍常州攻寧國常州平陞判行樞密院事取江陰  
下太湖收宜興尋與諸將攻江陰石牌海寇樂瑞奮  
戈躍馬陷陣死諸將大怒奮擊盡獲海舟擒瑞上

詔贈永義侯侑享 太廟子敬以父故陞督府僉事  
立功洪武二十三年封徽先伯食祿一千七百石子  
孫世嗣二十四年練兵邊塞召還明年又出南陽信  
陽練兵繕浚城隍經略屯田明年閱民籍軍平陽已  
而屢出山陝練兵病卒

花 茂

花茂巢縣人元季起兵從陳世光歲丙申歸附癸卯  
援安豐敗張士誠兵又於鄱陽湖戰滅陳友諒甲辰  
平武昌授威武衛百戶累以功多陞神策衛指揮僉  
事十三年調廣州左衛勦平陽春等縣叛賊十四年

收捕清遠博羅諸縣山寨十五年討海南叛蠻出海  
捕倭十九年東筦龍川民作亂統兵討平之二十年  
陞廣東都司指揮同知夷電白等賊二十一年破歸  
善等縣賊寨二十二年陞本司都指揮僉事五月陞  
都指揮同知賜誥子孫世襲廣州左衛指揮使是年  
擊南海香山黃連等寨二十四年七月收勦連州廣  
西湖廣等處徭賊三萬餘二十六年正月致仕 上  
命其子爲東勝右衛指揮僉事茂仍蒞事四月統軍  
蕩滅東筦筍岡等處二十七年茂上言徙廣東沿海  
地方東筦香山等縣逋逃蛋戶爲兵又奏添設沿海

依山廣海等衛所二十四處築城濬池收集海島隱  
料無藉等軍仍於要害議立堡揆軍屯守詔皆從之  
二十八年征捕海南等處山峒黎賊明年二月入覲  
上慰獎之且曰爾回令次子英來朝朕將用之六  
月茂回會番禺後山等寨賊叛命英同肇慶衛指揮  
夏忠領軍捕之獲其首從七十五人卽遣英赴京十  
一月茂在任奉制陞本司都指揮使三十年 上命  
英爲廣東都指揮僉事與張春共殄賊目黃黑面等  
地方靖寧四月二十日茂卒賜葬牛首山安德門外  
廣人祠之於粵秀山英武毅有父風自以軍功陞本

司都指揮使永樂中累建大勲後致仕

胡通

胡通合肥人至正乙未 太祖駐師和陽通挺身來  
附從渡江拔采石取太平攻溧陽破蠻子海牙水砦  
克建業定京口以功授總管從攻毘陵尋取宣徽戊  
戌從 上取金華己亥克諸暨攻越州陞鎮撫庚子  
偽漢陳友諒陷太平遂犯龍灣從擊敗之辛丑從征  
友諒破江州僞都徇下南昌自是戰彭蠡平武昌陞  
指揮副使甲辰從征贛州乙丑熊天瑞出降轉贛州  
衛指揮副使洪武元年會征南將軍廖永忠等征廣

東率師由韶州直據德慶四月率師略定英德清遠肇慶等郡邑進攻德慶遂引兵會永忠於廣州降元守將盧左丞陞指揮使陞僉大都督府事改前軍都督僉事數年致仕而卒

袁義

袁義廬江人初爲雙刀趙總管守安慶左君弼招之弗從庚子始來附命爲帳前親兵元帥辛丑從征友諒搗安慶江州壬寅下南昌授管軍千戶癸卯攻廬州殲友諒於彭蠡甲辰克廬州從上擊吳將敗走討平兩浙從攻蘇州陞興武衛指揮僉事隨征中原

沂州益都濟南東阿拔之洪武元年取東昌河南陝  
州潼關衛輝等郡敗元平章掩普達通州破元都同  
曹良臣追元宗室至龍興克永平逐北也速下保定  
從取太原于澤潞擊賀宗哲詹同獲其人馬略西京  
二年克鳳翔鞏昌與諸將合攻慶陽張良臣以兵薄  
義營義堅壁徐乘其困攻破之三年剗王保保營取  
興元陞本衛同知四年調羽林衛總領官軍防送馬  
都指揮渡海鎮遼五年統兵入海捕倭十四年勅征  
雲南克普定曲靖等處有功十五年鎮楚雄時虜累  
叛義積高壘調兵力戰虜遂遁去陞楚雄衛指揮使

二十三年入朝 上慰勞之且惜其老命太醫院爲  
染其鬚髯俾回撫治以威遠人特賜銀印與掌以寵  
重之三十二年陞右軍都督僉事卒於官子聚襲府  
軍左衛指揮使

陳聞

陳聞合肥人元末爲義兵千戶歲乙未六月 太祖  
渡江克太平遂率衆歸附授管軍千戶克溧水敗左  
侍御軍馬七月從總兵湯和克句容從克溧陽取采  
石克陳也先營進取南京攻常州破其城取寧國縣  
擊敗宣州援兵克江陰新安從攻湖州擊天目山等



寨克婺州諸暨尋取紹興衢州庚子同兆先征安慶  
尋拔江州調守龍江十一月從援長興明年以兆先  
薦授管軍百戶九月修築安慶城池從征武昌甲辰  
下武昌陞管軍千戶九月取荊州移戍歸州洪武三  
年僞夏來攻聞出兵奮擊大敗賊衆移守德安十一  
年陞成都衛指揮僉事十二年梁山大竹等處賊人  
叛亂奉調統官軍討之殺獲首級一百餘顆生擒五  
百人抵墊江高灘洞殺賊擊散之遂攻滅梁山龍馬  
槽寨平大竹縣賊從征雲南擊散大水腦通化等蠻  
論征南功陞成都右衛指揮同知與世襲二十四年

致仕子瑄襲本衛指揮同知累以平蠻功陞四川都  
指揮同知進都督封平江伯卒贈平江侯

吳復

吳復字伯起合肥人甲午率衆歸濠領前驅從克泗  
滁采石太平歷陞萬戶定建康授總兵攻鎮江守常  
州吳兵奄至死戰躍馬持矛追奔數里援宜興戰高  
橋仍守常州從征陳理圍廬州先登克漢沔授鎮武  
衛指揮同知守沔陽克汝州陞安陸指揮使調征陝  
西土番克河川從穎州侯平蜀從衛國公平九溪蠻  
進督府僉事從西平侯再征土番洪武十二年封安

陸侯世指揮使從潁川侯鎮雲南克普定充總兵官  
勦殺蠻寇北取廣西轉餉盤江卒追封黔國公謚威  
毅與子孫世侯券

楊 廣

楊廣巢縣人初事雙刀趙爲元帥以智勇聞歲丁酉  
四月歸附授左翼元帥副使十一月從總兵徐達攻  
池州克復宜興先是宜興復叛 上命達率師討之  
未下至是達遣兵絕其餉道帥廣等併力攻城遂拔  
之十二月從下婺州克諸暨攻紹興還婺取衢州庚  
子攻高郵先登策應濠州江州旣破陳友諒走武昌

壬寅遂下洪都留守禦癸卯攻吉安甲辰武昌平  
討熊天瑞於贛州乙巳正月天瑞降南雄韶州亦附  
丙午征進湖南益陽陞武英衛管軍千戶八月諸將  
伐張士誠廣乘海舟取湖州十一月合圍蘇州明年  
城破士誠就擒論功賜綵段超遷鷹揚衛指揮使十  
一月取沂州益都東伐萊陽洪武元年克河南路搗  
潼關階昭勇將軍渡河與僞官楊呂二平章大戰賊  
衆奔潰攻漢中克鳳翔鞏昌擊番寇敗去未幾奉旨  
開設鞏章衛授世襲誥四月襲王保保軍夷其營落  
征鐵石岷州回衛復奉旨統領官軍開設秦州衛隨

穎川侯傅友德克蜀階州文州援漢中進克成都八年詔領兵馬赴京調驍騎左衛九年隨徐大傅北征營於薊州五月師還改河州左衛指揮使十二年率所部隨西平侯沐英征洮州十八族等擒斬甚衆復於故城遇賊與戰中矢傷左脇尋卒計聞上爲之惻然勅有司歸其柩所過郡邑致祭賜葬於巢之柘臯命詞臣撰碑銘以昭勲節子潮初充叅侍改散騎舍人十二年征西有功襲興武衛指揮使十四年隨徐太傅討松州旋師北平卽從傅穎侯征雲南克普定羅具砦盤江普安曲靖擒司徒平章達里麻攻烏

撒土酋率衆迎戰擊敗之遂領本衛官軍城烏撒克  
霑益十五年刻雲南大佛龍海等砦四另策應大軍  
於金沙江及東川又從穎侯追東川寇至勝石上官  
渡楊柳江八月大破阿吉魯等山砦十二月援大理  
克佛光砦十六年討古州龍里洞砦又明年從宋國  
公北平操練二十一年卒孫海襲本衛指揮使

薛祥

薛祥無爲州人字彥祥元季兵亂乃集義兵保障邑  
郡適太祖駐師和陽祥遂從俞平章內附扈蹕渡  
江表爲水寨管軍鎮撫越明年丙午克臺城己亥攻

安慶壬寅下江西癸卯復廬州戰鄱陽得侍御黃船  
與議軍政 上語俞平章曰汝之功業非薛彥祥不  
能成就若總大兵攻淞凡破姑蘇下中原凡傳 旨  
密報惟祥是命洪武元年漕運河南孟津 上遣人  
謂曰聞有亡命者潛伏衝要恐來劫掠儻彼衆我寡  
不得輕敵時夜半抵蔡河賊果至祥諭之曰汝衆良  
善也兵亂嘯聚情出不得已今 聖天子出矣汝等  
當歸守家業無累妻孥縱汝百千人不過劫得千石  
我所部不下十萬餘待曉縱兵蒐捕汝何以存衆服  
其言而散 上聞之大喜嘗謂祥曰汝歷多軍功當

授武職而今用兵山東供億糧餉未得人汝相從于  
起事之初固有年矣簡在朕心若古之蕭何寇恂匡  
弼漢室不絕糧道欲汝效之授中順大夫京畿都漕  
運使自揚至蔡達濟壩堰皆崩塌䟽築晝夜無息考  
滿還京淮泗之民祝曰願公再來作我父母攀轅者  
遮道陽海州亂駙馬都尉黃琛俘馘萬餘人皆有名  
號註誤連坐者率皆良民祥與駙馬會問力排之曰  
無名號者不許妄指由是獲全者甚衆咸寫真生祠  
之乙卯誥授工部尚書明年改天下行省爲承宣布  
政司以北平爲重邊特授資政大夫北平布政使屬



縣民多貧乏尚有鬻子女者至卽責問以俸贖給時  
宰不悅罔以誣坐出知嘉興府明年召祥復侍東宮  
上謂曰姦臣每讒害汝汝何不言祥曰臣罔知其  
故竟以謗累卒

劉真

劉真合肥人乙未歸上從克溧水句容溧陽破中  
丞水寨陳也先管授總管攻常州又略石埭遇陳友  
諒戰敗之克婺衢復太平下南昌吉安敗張士誠於  
安豐廛友諒於鄱陽戰之湖口克武昌下湖州取無  
錫從征中原克沂州益都等郡取河南潼關潞州授

州百戶陞太原護衛千戶又陞興武衛指揮僉事  
調府軍衛從征南克普定盤江雲南諸郡調陞金吾  
後衛指揮使尋陞河南都指揮招降納哈出又征捕  
魚兒海哈刺陞右軍都督僉事督軍陝西總兵征西  
破哈梅城擒偽王子征廣西叛酋黃氏等山砦又征  
南丹州慶遠府分剿大藤峽及大雲黃土石塘池南  
等洞俱破之尋改左軍都督僉事三十五年陞右都  
督鎮遼東

周顯

周顯合肥人歲乙未 上駐師和州顯自黃山來附

六月翊從渡江拔采石取太平充帶刀先鋒克溧水  
句容溧陽丙申破中丞水寨搗陳兆先營取南臺鎮  
江下金壇丁酉取常州橫林樂杜等處四月克宣州  
收江陰征常熟與張士誠戰於望亭又擊敗陳保兒  
陞前部先鋒戊戌隨邵平章征湖州十一月從克婺  
州己亥克諸暨援常州陞帳前都先鋒庚子敗陳友  
諒兵追至采石遂復太平辛丑從援長興癸卯張士  
誠將呂珍盛兵寇安豐 上親援之顯從行擊走珍  
七月戰鄱陽湖甲辰平武昌回克廬州乙巳五月取  
安陸襄陽等處平章常遇春上其功陞驍騎衛千戶

十一月克泰州丙午從征浙西克湖州元年從破蘇州擒士誠陞金吾左衛指揮同知十月從征中原洪武元年正月從棣州尋援之三月克汴梁克河南府時上以汴梁爲北京五月親往巡狩回軍扈從七月攻取臬白寨又於汝州攻破毛葫蘆劉叅政營調策應陝州十一月征探潞村梅右丞逆戰顯手刃之十二月奉檄總領兵邏絳州路遂克河中二年改驍騎前衛指揮同知征迤北四月從常遇春至錦川追江文清六月至全寧追也速於北黃河克上都八月從李文忠援大同九月克馬邑進抵海峪口敗脫列

伯軍獲樞密知院等逐孔興至東勝州而還三年復從征沙漠二月克察罕腦兒進取上都五月克應昌府從左丞趙庸追蠻子太尉擒偽平章等復進江國公軍馬降之六月克紅螺山陞昭勇將軍驍騎前衛指揮使四年復從文忠北征六月進兵阿魯渾河與虜戰沒

劉謙

劉謙合肥人元季與兄友仁各起兵保鄉井聞太祖義師爲衆所附遂與兄俱來歸命叅隨胡大海克取黔縣祁門建德等處授友仁中軍左元帥府右副

元帥守禦太平縣與雙刀趙對敵歿於陣己亥謙襲  
兄職征進饒州克猪湖寨八月征浮梁攻饒州辛丑  
從 上征陳友諒拔九江僞都取興國府石榴寨狗  
下黃梅廣濟十二月招安江西壬寅調守江西癸卯  
三月調從征七月大戰陳友諒解豫章之圍克復吉  
安招徠安福州復克永新策應袁州甲辰征進平鄉  
虎背寨茶陵州調征湖廣岳州乙巳奉檄守禦吉安  
吳元年三月調除南昌衛副千戶十月隨征福建洪  
武元年克建寧等處四月扈從 車駕幸北京陞河  
南右衛正千戶閏七月收信陽光石腦等處寨克王

保保軍十月調守陝西七年陞廣武衛指揮僉事調  
守潞州十一年陞特進榮祿大夫中軍都督府尋以  
疾乞致仕後封流伯永樂十二年卒遺祭卹典優備

許榮

許榮字榮卿舒城人倜儻好施果決有爲元季橫潰  
之餘邑民顛連無告榮乃團立烏沙屯戍加以招懷  
綏輯散亡復合生齒蜂集室廬櫛比甲午春有青軍  
大肆殺掠腊肉爲食灑血爲漿凡所經由不遺噍類  
榮發令運謀以防不測連營扼險設伏乘機以禦之  
卒獲安堵是秋趙雙刀攻陷廬州榮則攻擐甲冑士

卒奮勇竟逐之遠遁已乃脩治溝壘營繕器械勞必  
身先寢食幾廢又爲城建七門堰防三水樓櫓如畫  
過者不敢仰視焉甲辰 高皇帝統御六師蕩平海  
宇榮乃焚香誓衆曰我堅守十年於茲者豈貪天功  
爲已力爲爾鄉井全生計耳今天命有歸吾屬其無  
憂矣時卽表上符印其軍實名數租賦悉版以獻有  
旨邊事未寧仍領所屬卽授廬州府同知士民愛戴  
甚於父母比其卒相與立祠祀之曰許侯惠民祠世  
世尸祝勿絕

朱亮祖



朱亮祖六安州人元義兵元帥乙未 上克寧國擒

亮祖喜其勇悍賜金帛俾仍舊官居數月復叛數戰

敗我兵七千餘人丙申下建康明年克毘陵遂遣徐

達等討之進圍亮祖於寧國常遇春被創而還 上

自往督戰亮祖兵敗縛以見 上上曰爾將何如對

曰生則盡力死則死耳 上壯其言鞭而釋之留置

麾下自是從軍四征所向克捷以功陞元帥至院判

從征友諒克九江下南昌江西諸郡大戰鄱陽湖平

武昌陞廣信衛指揮使會胡深討陳友定取浦城克

崇安建陽等處乙巳張士誠兵寇諸全新城亮祖以

兵擊之焚其營落數十攻桐廬圍餘杭降僞平章溪  
元明陞浙江行省叅知政事副李將軍守杭吳元年  
丁未帥馬步舟師討方國珍國珍拒戰敗劔夜走黃  
巖亮祖入其城遂徇下仙居諸縣進兵温州國珍子  
明善戰敗挈妻子遁去克其城分兵徇瑞安還至黃  
巖方氏父子來降送建康洪武元年二月 上以浙  
閩旣平乃命亮祖爲征南副將軍與廖征南取廣東  
進取廣西師還 太子率百官迎勞龍灣洪武三年  
封永嘉侯食祿一千五百石與世券四年三月 上  
以諸將伐蜀久無功復命亮祖爲征虜右副將軍率

往助之肅兵至蜀傅友德已攻克階文永忠克重慶乃分兵徇下州縣之未附者蜀地悉平還師與何文輝同鎮北平移鎮廣東番禺知縣道同上言亮祖不法數十事 上念功臣不下吏罷職令居江寧之安德鄉十三年以疾卒 上爲築墳以侯禮葬之

王珪

王珪合肥人慷慨有大志少時爲淮西廉訪司隸卒見官長儀衛尊崇輒慨然歎曰將相無種在人爲耳及元末兵亂募集鄉民守廬州自稱萬戶 上取  
陽珪自廬州來歸遂從渡江克太平命珪仍爲萬戶

守太平積功陞左軍都督府都督僉事子安富從  
上征婺州守南陵取潛山擒獲甚衆攻安慶被劄而  
死仲子安貴從征江州亦戰沒至是珪以疾卒季子  
寬襲職未幾亦卒

汪河

汪河舒城人少有大志倜儻傑出嘗師武威余文忠  
公盡其底奧其宏材遠略卓邁流輩元季紛亂靡所  
適從 太祖高皇帝渡江首被知遇用爲行省掾吏  
累陳時務 上高其才識叅謀帷幄贊畫兵政大有  
裨益擢大都督府都事出入左右馭歷中外惟所任

使元察罕帖木兒克復汴梁兵威甚振 上命河使

察罕與之結援議論稱旨察罕子擴廓帖木兒遣使

來通好 上卽遣河與俱往荅其意河至河南擴廓

拘留之時虜尚盛兵中原 上方有事江漢未遑讐

校及陳友諒亡諸郡咸附 上乃以書與擴廓帖木

兒責以拘留前使書至不遣凡三以書遺之仍不遣

後元罷擴廓官奪其軍洪武元年王師下河洛擴廓

懼始以河還河被拘凡六年抗厲不屈完節來歸

上嘉重之卽陞爲吏部侍郎河備陳虜中事且上方

略擴廓竟由是取敗二年秋推陞爲御史臺侍御史

歷陳讜論內外諸政補益甚多九年上封晉王于太原簡朝之重臣爲之傅以河帷幄舊勲先使虜域忠節顯著繼在中臺功業茂隆遂拜爲晉王相親御便殿面諭而臨遣之河領眷命普殫心力時天下初定干戈甫戢民力未舒河以身任之咸底厥績其在王所也啓沃彌綸鞠躬盡瘁居數歲竟大治竟卒於官

陳瑄

陳瑄字彥純合肥人父聞開國功歷陞成都右衛指揮同知父謫戍遼陽瑄請代戍從征卜木瓦寨冒險先登敗賊復從征餘寇一日十三戰明日又七戰擒

賈哈刺陞四川行都司同知進督府僉事建文時召  
防江靖難兵至江上具舟迎降封平江伯食祿千石  
世指揮使永樂初北京遼東軍儲不足充總兵都督  
帥舟師海運歲米百萬石請建百萬倉直沽尹兒灣  
城天津衛籍兵萬人戍守舟經海島下令交市人不  
敢譁兩便之會有倭劫沙門島瑄以漕舟追至朝鮮  
境盡焚其舟殺溺死者甚衆三率舟師備倭闖海海  
濫江北岸崩瑄起堤自海門歷通泰北至鹽城凡八  
百里又役夫二十萬起高丘嘉定爲海運表識名寶  
山 上爲文樹碑山上旣開會通河罷海運乃建議

造淺艇二千艘歲運二百萬石復增至五百萬石疏  
清江浦引水由管家湖入鴨陳口達淮就管家湖築  
堤亘十里以便引舟浚儀鎮瓜州通潮鑿呂梁百步  
二洪開秦州白河通大江築高郵湖堤堤內作渠亘  
四十里淮濱作常盈倉五十區貯江南輸稅徐臨清  
德州皆建倉便轉輸河淺處輒膠舟濱河至舍五百  
六十八所舍置淺夫俾導舟可行處緣河隄鑿井樹  
木便人行 獻陵初下詔求言陳七事其一言江南  
轉漕軍民並困 上覽之戚然令有司議所以寬恤  
者仍 勅獎與世伯券 景陵時鎮守淮安兼督漕



運漕政益修卒贈侯謚恭襄閩英毅弘度偉略稠  
人廣會談論疊疊公餘披閱載籍考知往古成敗治  
亂之故喜近逢掖士時相講議能推利濟人

張子貞

張子貞字彥誠英山人洪武間由國子生授兵部車  
駕司主事進本司員外郎未幾以言忤謫戍嶺海尋  
起爲刑部員外進郎中出爲山東僉事以切直不容  
于時又謫死馬寺戍留題有君臣義莫忘之句 太  
祖聞之詔復其官尚書蹇義嘗歎曰做官不必遠法  
古人近法張子貞可矣尋起爲車駕司主事歷官叅

政敷歷中外凡四十年清心苦節寵辱不驚爲時論  
所歸